

L I G J
Nr.8768, datë 19.4.2001

PËR RATIFIKIMIN E “MARRËVESHJES NDËRMJET KËSHILLIT TË MINISTRAVE TË REPUBLIKËS SË SHQIPËRISË, DIOQEZËS NË RRËSHEN DHE KARITASIT SHQIPTAR PËR NGRITJEN DHE FUNKSIONIMIN E SHKOLLËS SË MESME PROFESIONALE “SHËN JOZEFI PUNËTOR””

Në mbështetje të neneve 78, 83 pika 1 dhe 121 të Kushtetutës, me propozimin e Këshillit të Ministrave,

K U V E N D I

I REPUBLIKËS SË SHQIPËRISË
V E N D O S I :

Neni 1

Ratifikohet “Marrëveshja ndërmjet Këshillit të Ministrave të Republikës së Shqipërisë, Dioqezës në Rrëshen dhe Karitasit Shqiptar për ngritjen dhe funksionimin e shkollës së mesme profesionale “Shën Jozefi Punëtor””.

Neni 2

Ky ligj hyn në fuqi 15 ditë pas botimit në Fletoren Zyrtare.

Shpallur me dekretin nr.2991, datë 4.5.2001 të Presidentit të Republikës së Shqipërisë
Rexhep Meidani

MARRËVESHJE
PËR NGRITJEN DHE FUNKSIONIMIN E SHKOLLËS
SË MESME PROFESIONALE "SHËN JOZEFI PUNËTOR" NË RRËSHEN, MIRDITË

Këshilli i Ministrave i Republikës së Shqipërisë, Dioqeza në Rrëshen,
Karitasi Shqiptar

Duke patur parasysh se, si rezultat i kushteve të tranzicionit në të cilin ndodhet Shqipëria, janë evidentuar një sërë problemesh sociale (varfëria, papunësia, largimi nga vendi) që kanë përfshirë kryesisht të rinjtë dhe që kërkojnë një ndërhyrje për zbutjen dhe parandalimin e tyre;

Duke patur parasysh se ekziston një masë e konsiderueshme të rinjsh të cilët kanë nevojë për ndihmë edukative, profesionale, shoqërore;

Duke patur parasysh faktin se qëllimi i kësaj Marrëveshjeje është që t'u ofrojë atyre ndihmë shkollimi për t'i aftësuar profesionalisht, nëpërmjet ngritjes dhe funksionimit të një shkolle, e cila jep mundësi për përgatitjen e tyre dhe të një konvikti për të favorizuar ata që vijnë nga zonat e thella e më të varfëra;

Duke patur parasysh se në Dioqenëza e Rrëshenit, e cila përfshin rrethet Mirditë, Mat, Bulqizë, Dibër nuk ekzistojnë shkolla të tilla profesionale;

Duke patur parasysh se kontaktet me përfaqësues të ndryshëm të qeverisë miratojnë ngritjen e një shkolle të tillë, palët nënshkruese janë dakord të lidhin një marrëveshje si më poshtë:

1. Objekti i Marrëveshjes

- Bashkëpunimi në fushën e edukimit profesional, i cili konsiston në ngritjen dhe funksionimin e shkollës profesionale dhe të konviktit për t'iu përgjigjur disa problemeve emergjente të kohës për kategoritë e mëposhtme:

a) të rinjtë adoleshentë nga moshë 14-18 vjeç;

- b) të rehat nga mosha 14-18 vjeç.
- 2. Kohëzgjatja e marrëveshjes.
 - Marrëveshja do të vazhdojë për periudhën e nevojshme të ndërtimit të shkollës dhe pajisjes, deri në fillimin e aktivitetit mësimor në marrëveshje.
 - Ky afat mund të ndryshojë mes palëve.
- 3. Qëllimi i Marrëveshjes
 - Qëllimet e veprimtarisë së Karitasit Shqiptar dhe të Dioqezës në Rrëshen për këtë Marrëveshje janë humanitare dhe jofitimprurëse.
 - Qëllimet e saj janë të bazuara në shqetësimin për të rinjtë dhe në kujdesin nëpërmjet programeve mësimore të përcaktuara nga Ministria e Arsimit dhe Shkencës, në bashkëpunim me Dioqezën, duke respektuar liritë ideologjike dhe besimet fetare, në përputhje me dispozitat kushtetuese dhe dokumentet e të drejtave të njeriut.
- 4. Financimi
 - Projekti, mbi bazën e të cilit nënshkruhet Marrëveshja, financohet plotësisht nga shoqata bamirëse ndërkombëtare, në favor të Dioqezës së Rrëshenit, e cila ka një vlerë prej tre miliardë liretash (përfshijë TVSH-në).
- 5. Palët nënshkruese të marrëveshjes
 - Këshilli i Ministrave i Republikës së Shqipërisë;
 - Dioqeza Rrëshen, me seli në Rrëshen, rruga "Shën Vinçenco de Paoli", përfaqësuar nga administratori apostolik i saj Mons. Cristoforo Palmieri;
 - Karitasi Shqiptar, shoqatë joqeveritare, fetare e bamirëse, pa qëllime përfitimi ekonomik, me adresë rruga "Don Bosko", Tiranë, regjistruar si person juridik me vendim të formës së prerë të Gjykatës së Rrethit Tiranë me nr. 6415, datë 16.10.1995, përfaqësuar nga Don Nikë Pace.
- 6. Dioqeza Rrëshen merr përsipër:
 - Të verë në jetë programin sipas linjave operative, të përligjura në dokumentin e projektit bashkëngjitur.
 - Të gjejë vend ndërtimi të përshtatshëm për ngritjen e shkollës dhe të blejë tokën me fondet e saj.
 - Të zbatojë legjislacionin në fuqi të Republikës së Shqipërisë.
 - Brenda territorit të blerë, të zhvillojë, në strukturën e vet, ndërtesa dhe terrene (sipas projektit) dhe aktivitete mësimore me vetëfinansim, të cilat nuk do të kenë qëllim fitimi.
 - Të garantojë deri në realizimin e projektit mbulimin dhe shpenzimet e veta, për ngritjen dhe funksionimin e shkollës, pagat e personelit, duke përfshirë në to sigurimet shoqërore dhe shëndetësore.
 - Të bëjë seleksionimin e kandidatëve për në shkollë, duke u bazuar në kriteret e përcaktuara për zbatimin e programit nga ana e kandidatit dhe dispozitat ligjore në fuqi.
 - Të bëjë seleksionimin e operatorëve shqiptarë për pjesëmarrjen e kërkuesit, në bazë të principeve që frymëzojnë Dioqezën, si gatishmëria për shërbim, përgatitja e lartë profesionale, vullnetarizimi etj.
 - Të sigurojë në shkollë shërbime dhe mësimdhënie që të jenë të paktën në të njëjtin nivel me ato të siguruar nga institucionet shtetërore.
 - Të sigurojë në konvikt ushqime të garantuara dhe normativat e shpërndarjes të jenë sipas kriterëve të Ministrisë së Bujqësisë dhe Ushqimit.
 - Të sigurojë në shkollë dhe konvikt kushte higjieno-sanitare dhe mjekësore, në përputhje me kriteret e vendosura nga Ministria e Shëndetësisë.
 - Të aktivizojë çdo formë financimi të mundshëm në nivel kombëtar, ndërkombëtar, si dhe të vetëfinansimit, si kusht financiar për realizimin e projektit.
- 7. Karitasi Shqiptar merr përsipër:
 - T'i besojë Dioqezës të gjitha përgjegjësitë për zhvillimin e aspekteve strukturore, teknike, profesionale, mësimore dhe të drejtimit të projektit bashkëngjitur dhe të jetë garant për realizimin e tij.
 - Të respektojë legjislacionin shqiptar.
- 8. Këshilli i Ministrave i Republikës së Shqipërisë merr përsipër:
 - Të lehtësojë procedurat e licencimit, lejet e zakonshme dhe autorizimeve për vënien në jetë dhe përfundimin sa më të mirë të projektit.
 - Të përjashtojë të gjitha aktivitetet e Dioqezës dhe Karitasit të cilat janë të lidhura me projektin dhe programin e shkollës së mesme profesionale nga të gjitha taksat doganore dhe

administrative, duke përfshirë edhe TVSH-në.

- Të ndihmojë për furnizimin me ujë, energji elektrike, gazi (në masën që bëhet furnizimi i popullatës së vendit), për kanalizimet, linjën telefonike, si dhe shërbime të tjera, që mund të nevojiten për ngritjen dhe funksionimin e shkollës.

- Këshilli i Ministrave i Republikës së Shqipërisë cakton Ministrin e Arsimit dhe Shkencës për të ndjekur zbatimin e kësaj Marrëveshjeje.

9. Mbarimi i Marrëveshjes.

- Kjo Marrëveshje përfundon:

- me mbarimin e afatit të përcaktuar në Marrëveshje;

- kur shkelen detyrimet e palëve dhe dispozitat e kësaj Marrëveshjeje;

- kur nga palët konstatohet largim nga objekti dhe qëllimi i Marrëveshjes.

- Në përfundim të Marrëveshjes nëse ajo nuk do të rinovohet, godina dhe të gjitha pajisjet i mbeten Dioqezës së Rrëshenit.

10. Pika e diskutimit

- Kur palët kanë mosmarrëveshje midis tyre, krijohet një komision i përbashkët tripalësh me përfaqësues nga Këshilli i Ministrave i Republikës së Shqipërisë, Dioqeza Rrëshen dhe Karitasi Shqiptar, të cilët brenda dy muajve, do të zgjidhin mosmarrëveshjen, nëpërmjet bisedimeve dhe frymës së mirëkuptimit.

11. Dokumentet shoqëruese të Marrëveshjes janë:

- statuti i shoqatës së Karitasit;

- vendimi i regjistrimit në gjykatë të shoqatës Caritas.

- akti i themelimit të shoqatës Caritas;

- historiku i veprimtarisë së shoqatës Caritas;

- projekti për shkollën e mesme profesionale;

- kërkesa zyrtare për ushtrim aktiviteti;

- dokumenti për vërtetësimin e pronës mbi tokën;

- garancia bankare e Dioqezës së Rrëshenit.

12. Data e hyrjes në fuqi të Marrëveshjes

- Marrëveshjen, pasi e lexuan, palët e gjetën konform ligjit dhe me vullnetin e tyre të plotë e nënshkruan sot më datë 14.2.2001, Tiranë.

- Marrëveshja është hartuar në gjuhën shqipe në pesë kopje origjinale.

- Kjo Marrëveshje nënshkruhet nga Këshilli i Ministrave i Republikës së Shqipërisë, Dioqeza e Rrëshenit, Karitasi Shqiptar dhe hyn në fuqi pasi të verifikohet nga Kuvendi i Republikës së Shqipërisë.

Këshilli i Ministrave i Republikës së Shqipërisë	Vendi /Data
Ethem Ruka	14.2.2001

Mons. Crisoforo Palmieri	Vendi /Data
Administratori Apostolik	14.2.2001

KARITASi SHQIPTAR	Vendi /Data
Mons. Rrok Mirdita	14.2.2001